

姜先生全集



姜先生全集



湛園札記卷三

全集二十二

邑後學

馮保燮

重編

王定祥

顧亭林日知錄曰嶽頂無字碑世傳爲秦始皇立因
取史記反覆讀之知爲漢武帝所立也史記秦始皇
本紀云上泰山立石封祠祀其下云刻所立石是秦
石有文字之證今李斯碑是也封禪書云東上泰山
泰山之草木葉未生乃令人上石立之泰山巔上遂
東巡海上四月還至奉高上泰山封而不言刻石是
漢石無文字之證今碑是也又云始皇刻石之處凡

六史記書之甚明無不先言立後言刻者古人作史文字之密如此使秦皇別立此石秦史焉得不紀使漢武有文刻石漢史又安敢不錄乎案顧氏之言辯矣然史記封禪書漢書武帝本紀注引風俗通曰石廣二丈一尺刻之曰事天以禮立身以義事父以孝成民以仁四海之內莫不爲郡縣四夷八蠻咸來貢職與天無極人民蕃息天祿永得云此古制也則武帝已用之矣又後漢書張純傳帝乃東巡岱宗以純視御史大夫從并上元封舊儀及刻石文若無文字則不當云刻石又不當增文字也

金初制杖罪至百則臀背分決及海陵庶人以脊近
心腹禁之雖主決奴婢亦論以違例海陵凶暴而此
舉暗合唐文皇

後唐張文寶知貢舉進士有覆落者下學士院作詩
賦貢舉格學士李憚曰予少舉進士登科蓋偶然耳
後生可畏來者未可量假令予復就試禮部未必不
落第安能與英俊爲準格聞者多其知體金明昌中
禮部尙書張行簡轉對言擬作程文本欲爲考試之
式今會試考試官御試讀卷官皆居顯職擢第後離
筆硯久不復常習今臨試擬作之文稍有不工徒起

謗議詔罷之此二段議論皆得體蘇子瞻曰麻衣如
再著墨水真可飲前輩虛心如此亦是實理今制試
錄不用程文是也而淺學小生紛紛擬作必爲二君
含笑於地下矣

定祥案此卽未定稿
雜著中張文寶一則

金宗室表右宣宗子與末帝凡四人案宣宗子哀宗
諱守緒非末帝也末帝諱承麟哀宗本紀云內族承
麟金制疏族稱完顏明昌後避睿宗諱稱內族則承
麟本疏族非宣宗子也今以哀宗爲末帝旣大誤又
不譜哀宗世系并承麟不知何出史官之紕繆極矣

劉歆作遂初賦自以朝政多失作遂初賦以歎往事
而寄已意其辭曰處幽潛德舍聖神兮抱奇內光自
得真兮寵幸浮寄奇無常兮寄之去留亦何傷兮大
人之度品物齊兮舍位之過忽若遺兮求位得位固
其常兮守信保己比老彭兮其言頗似曠達而爲莽
佐命終致夷滅視孫綽之義正桓溫相去何啻霄壤
遼史職官志引宋刁約詩押宴夷離堇疑夷離堇亦
是執政重臣予讀金史禮儀志凡行省來宴回宴之
押宴官皆從行省定差就借以文武高爵長官之職
以爲轉銜之光想此卽遼遺制雖在朝廷亦借銜也

金遼史記事多重複天祚天慶二年駕幸混同江頭
魚酒酣上命諸部長歌舞女直阿古達直視云云見
樂志又見天祚本紀又見蕭奉先傳帝命耶律義先
對蕭革巡擲大罵事一見義先傳一見革傳鴨子河
頭驚事一見樂志又載巴納河又屢見他傳語皆無
詳略至蕭浞卜與蕭匹敵爲欽哀皇后所誣而殺蕭
奉先傳復云欽哀弒仁德皇后奉先與蕭浞卜匹敵
等謀居多一事而互相矛盾尤大謬宜改正

金史忠義列傳云聖元詔修纂遼金宋史史臣議凡
前代之忠於所事者請書之無諱朝廷從之嗚呼仁

哉聖元之爲政也此事今修明史當引以爲例
詩有五際四始四始者大明在亥水始也四牡在寅
木始也嘉魚在巳火始也鴻鴈在申金始也此緯家
之言四始與詩序較異

酒名三白取豐年之兆蝗蟲一雪入地三尺三雪則
入地九尺故三白爲豐年之兆也

宋朱彥可談記都下市井謂不循理者爲乖角又謂
作事無據者爲沒雕當喪禮冒發摺以一竿揭之名
乖角衛士順天幘頭有一腳下垂者其儕呼爲雕當
今吾鄉亦有無雕當之稱宋當讀作去聲吾鄉則入

聲耳

吾鄉諺語看三色三色字出於韓嬰詩傳呂氏春秋
呂子昔者禹一沐而三握髮一食而起三以禮有道
之士周公吐握之說見於荀子人罕稱禹也

張僧繇於江陵天皇寺圖孔子十哲之像或謂不宜
僧繇笑曰吾誠偶然安知不利於後人者莫知其旨
及後周滅二教惟此寺有宣尼像得不毀吳仲圭將
卒自題其墓曰花光和尚之墓後楊連真珈徧發人
塚見仲圭之表疑爲僧墓不發二君非解術數者豈
非用志不紛乃凝於神耶

明制命婦入朝贊行四拜禮皆下手立拜惟謝賜時
一跪叩頭耳而民間婦女俯伏稽首與男子無異何
哉

兄弟之子與父之兄弟其稱謂不見於經大抵從父
而推者皆得蒙父稱從子而推者皆得蒙子稱故父
之昆弟先生爲世父後生爲叔父父之從父昆弟爲
從父父之從祖昆弟爲族父蓋謂我父者我謂之子
謂我祖者我謂之孫朱子云兄弟之子稱猶子自曾
祖而下三代稱從子自高曾四代而下稱族子是也
若姊妹於兄弟之子則推而遠之矣故爾雅曰女子

謂昆弟之子爲姪謂姪之子爲歸孫然姪亦女子之號因娣姪而得名者非男子之正稱也無已則對姑而稱之斯已耳案僖十五年左右氏載晉史蘇之占曰姪其從姑注謂我姪者我謂之姑謂子圉質秦此正男子對姑之稱也其子姪叔姪之稱於後世者史記魏其傳云田蚡乃爲諸郎侍酒跪起如子姪謝安石云聖賢去人其閒亦邇子姪未之許是也然亦有徑稱子者史記二疏傳云父子相隨出關後漢書蔡邕傳將作大匠陽球飛章言邕及質邕上書自陳如臣父子欲相傷陷云云晉書朝議欲以謝元爲荊州刺

史謝安自以父子名位太重云云南燕慕容興根謂慕容寶叔父德曰昔蒯瞶出奔衛輒不納春秋是之以子拒父猶可況以父拒子乎是皆以叔姪爲父子也至韓退之興元少尹房君墓志子曰次卿述其弟式之言曰子與吾兒次卿游是竟稱姪爲兒矣此則唐以前猶爲近古者也南史王球傳王履深結劉湛誅湛之夕履徒跣告球其叔父也球曰阿父在汝亦何憂注江南人謂叔父伯父爲阿父爲叔伯父者以自呼宋惟黃魯直上叔父夷仲詩曰更懷父子東歸得手種江頭柳十尋案古者卿大夫五十不稱字別以伯

仲天子稱同姓曰伯父叔父是稱也達於天下蓋伯
叔者長幼之稱也若諸父止稱伯叔則是以長幼爲
次序而以父之昆弟同於凡人之稱矣

禮惟婦稱夫之兄弟曰伯

叔見後

此後世失禮之甚者也然豈獨此哉左傳無女

而有姊妹及姑姊妹疏引樊光曰春秋傳云姑姊妹
若父之姊爲姑姊父之妹爲姑妹列女傳梁有節姑
妹入火而殺其子又左傳季武子以公姑姊妻邾庶
其疏曰或曰是父之姊是也蓋稱姑者有二一爲婦
於其夫之母一爲姪於其父之姊妹今以男子而稱
父之姊妹爲姑亦何以自別於婦人者故知古人稱

謂之閒字必有義後人日趨便易不悟其失良可慨也

母之昆弟爲舅而男子謂姊妹之子曰出然左氏公羊率謂之甥也爾雅妻之父爲外舅謂我舅者我謂之甥故孟子曰帝館甥於貳室是翁壻亦得甥舅稱之矣稱於王母昆弟曰彌甥見於左傳哀二十三年宋景曹卒季康子曰以肥之得備彌甥注父之舅氏故稱彌甥亦曰從孫甥見於哀二十五年衛夏戊之女太叔疾之從孫甥也注姊妹之孫爲從孫甥其稱王母之昆弟未有聞後漢書郭況族姊爲皇祖考夫

人見光武光武大喜曰乃今得大舅也然則漢之稱
王母之昆弟爲大舅也妻稱夫兄弟曰伯叔伯叔猶
兄弟之稱也亦曰兄公見爾雅夫之兄爲兄公夫之
弟爲叔夫之姊爲女公夫之女弟爲女妹漢書薛宣
傳敬武長公主曰嫂何爲取妹曹大家女誠亦云嫂
妹是也夫兄之妻姒也亦通謂之嫂漢張負以女孫
嫁陳平戒曰汝事兄伯當如父事嫂當如母今俗稱
夫之女兄弟曰姑是從女之稱因亦有稱妻之兄弟
曰舅者皆謬也朱子語錄曰據前輩但以兄弟稱之
據此夫之女兄弟通稱姊妹於古亦合

左傳凡諸侯有命告則書不告則不書杜注承其告辭史乃書之於策若所傳聞行言非將君命則記在簡牘而已不得記於典策此蓋周禮之舊制案策書存國之大體故宜略簡牘載四方之傳聞故宜詳二者之史缺一不可後世實錄則策書之類也而簡牘無聞焉實錄所書又不實然後野史以興究其原亦簡牘之類與

凡作事必量力以豫爲其後來可以收拾之地楚之僭王其大罪也昭王之死非楚之罪以管仲之智豈其見不及此而乃執此以相詰何也蓋自量其力不